



Jumat, 07 April 2023
Ogen: Johanes 3:16-17



"Si Engkelini Manusia"



Kai kin si idarami manusia bas doni enda? Jenari uga carana ndatken si idaramina e? Penungkunen enda mabai kita lako ngerenungken kerna teksta bage pe tema paksa teneng wari enda. Kerna kai kin si idarami manusia e me kesenangan. Cara manusia guna ndatkenca e me alu latihan erdahin; medak erpagi-pagi jenari lawes erdahin; gelap maka seh rumah; idat me ulih erdahin tujunna gelah senang.

Kesenangan si tahu-tuhu si erbahan manusia terkelin rehna bas Dibata nari. *"Sabab bage **pengkelengi Dibata** doni enda, emaka **ibereNa anakNa Sitonggal**, gelah **ola bene ise pe si tek** man Bana, tapi gelah **dat kegeluhen si tahu-tuhu** si la erkeri-kerin. Sabap Dibata nuruh AnakNa ku doni enda labo jadi Hakim tapi jadi **si ngkelini manusia**".* Kata Dibata enda nuduhkenca maka keterkelinen ialoken manusia erkiteken perkeleng ate Dibata kempak manusia. Dibata ngenca ngasup erbahanca manusia terkelin. Manusia labo ngasup engkelini kegeluhenna. Banci saja nge kita ndarami kesenangan si erbahan kita senang, tenang ras mejuah-juah; justru si megati si darami e, erbahansa kita rubati erkeluarga, lupa nandangi tanggung-jabapta selaku warga gereja bage pe si tadingken Dibata tarum ngayaki kesenangan. Keterkelinen e rehna i bas Dibata nari. Dibata erinisiatif lako mereken AnakNa Si Tonggal gelah lit dalanna kita lako ndatken keterkelinen.

Erkiteken Dibata si engkelini geluh manusia labo lit dalanna manusia nilah i bas Dibata nari. Erkiteken Dibata si engkelini manusia labo lit dalanna manusia la pehaga Dibata. Emaka mari sidadhken biak simehuli i bas geluhta erkiteken Dibata si engkelini kita.

"Manusia terkelin erkiteken Dibata si engkelinisa"